

# L'ESCOLO DEIS FELIBRES

## DÓU VAR.

### SA FOUNDACIEN - SOUN REGLAMEN

#### L'ESCOLO DEIS FELIBRES DOU VAR.

Ou coumençamen dóu mes d'abriou 1880, quàuqueis prouvençaus, proun couneissus pop prendre, quand si déu, leis parts de soun despartamen, de sa lengo e de soun istòri, reçuberoun aquesto cunvidacién:

Moussu,

Quand aqué legi lis estatut dóu felibrige, que recouneisson à tóuti li dialèite de nosto lengo lou dre de viéure e de teni sa plaço au fougau de la patrío miejornalo, neste paure ami, Félix Peise, diguè dins lou Franc Prouvençau de l'an 1878: *perque cadun es libre de parlar et de cantar coumo lou bouan Dieu l'a apprès, vesi pas “ perqué lou despartament dau Var, à l'eisemple deis autres, poudriè pas fourmar uno escolo que, tout en gardant soun independenci, dounarie la man à la grando filialo latino....*

*Seriou ben huroux se, dins l'Armana de l'an que vent, poudiou dire: l'escolo dau Var est fourmado!!!*

Entremen que parlavo ansin, neste ami se presentavo au félibrige, e fuguè reçaupu felibre mantenèire dins la sesiho de la mantenènça, tengudo à Marsiho lou 3 de mars 1878. Pamens d'afaire que poudien pas si remanda, de malhur de filialo et d'autri causo l'empachèron de metre la man à soun prefa; mai se proupousavo de reprendre l'obro pèr que fau pas que digoun *que lou Var es en arrièro et que fougno per pas dounar la man à la grando filialo Prouvençalo* (Lou Franc Prouvençau de l'an 1879)

Ailas! Aqueù vot patriouti neste ami noun a poustu lou vèire coumpli de soun vivènt; mais sian quàuquis un que, resta fidèu à sa memòri, avèn contunia la publicacioun dóu Franc Prouvençau, aquelo obro d'elei ounte escampavo à pleno man li belugo de soun esprit, e que nous sian proumés de persegui soun darniè proujet: la creacioun de l'escolo dóu Var!

Adounc, Moussu, couneissènt vosto devoucioun pertout ce que pretoco nosto Prouvènça, soun istòri coumo sa lengo, ai l'ounour de vous cunvida à l'assemblado preparadisso que se tendra à Draguignan, lou 17 dóu mes d'abriéu 1880, à uno ouro d'après-miejour, dins la salo de la *Société d'études scientifiques et archéologiques de Draguignan*, carriero de l'Evescat, n° 9, au plan-pèd, per fin de constituï l'escolo dóu Var, discuta e adouta soun reglamen, nouma soun bureù, etc.

Es bon de vous dire que lou félibrige foro-bandis de si réunioun li discussioun poulitico o religioso, e que l'escolo dóu Var noun s'ocupara que de la lengo e de l'istòri de Prouvènça, particularimen d'aquèstis encountrado.

Sarian urous, Moussu, se nous fasias l'ounour de vous rendre à nosto cunvidacioun o tout aumens de manda vosto cunsentido à l'obro qu'an an entreprendre; e, dins aquelo espèro, vous semounde mi salut li mai courau.

Lou Vice-Sendi per lou despartamen dóu Var,

A. MICHEL,  
Felibre-majourau, mestre en gai-sabé.